

Aatsitassanut inatsisip allanngortinneqarnissaanut siunnersuummik UKA2022-mi saqqummiussinissamik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut, taamaalilluni inatsimmi § 1, imm. 2 ima oqaasertalerneqassalluni: “Ingerlatanik inatsimmut ilaasunik suliarinninnermi isumannaallisaaneq, peqqissuseq, avatangiisit, pisuussutinik atorluaaneq kiisalu inuiaqatigiinnut akornutaanngitsumik ingerlatat suliarineqarnissaat kiisalu pissutsini assigiinngitsuni nunat tamat pitsaanerpaamik ileqqorissaartarnerat akuerisaasut qulakkeerneqarnissaat Inatsisartut inatsisaatigut anguniarneqarpoq”. § 83-mi oqaasertaliussaq “nunat tamat ileqqorisartagaat pitsaasut” aamma ”nunat tamat pitsaanerpaamik ileqqorisartagaat, Kalaallit Nunaanni pissutsinut naleqqussagaq”-mut aamma allanngortinneqassaaq. Taamattaq misissueqqaarnissanut qinnuteqaatinik paasissutissanik Naalakkersuisut tamanut saqqummiussisalernissaannik inatsimmi aalajangersagaliisoqassaaq, taamaaliornikkut piffinni innuttaasut soqutigisaqartullu allat, sapinngisamik siusinnerpaamik taamatut suliaqartoqarnissaannik ilisimasaqalersinnaaqullugit.

(Inatsisartunut ilaasortaq Mariane Paviasen, Inuit Ataqatigiit)

Akissuteqaat

(Ineqarnermut, Attaveqaasersuutitut, Aatsitassanut, Inatsisit Atuutsitsinneqarnerannut Naligiisitaanermullu Naalakkersuisoq)

Siullermeerneqarnera

Naalakkersuisut sinnerlugit Mariane Paviasen, Inuit Ataqatigiit, siunnersuuteqarneranut qutsavigaara.

Siunnersuummi saqqummiunneqartumi avatangiisinut pitsaassusissat, innuttaasunik akuutitsineq ammasuunissarlu pillugit apeqqutit kalluarneqarput, qulequttat tamarmik Naalakkersuisunut pingaaruteqartut.

Aatsitassanut inatsimmik aammalu annikitsumik aatsitassarsiornissamut inatsimmik, aatsitassanut ikummatissanullu inatsimmi aalajangersakkanut taarsiisussanik, saqqummiinissaq Naalakkersuisut pilersaarutigaaq. Inatsisissat taakkua marluk innuttaasut akuutinneqarnissaannut ammasuunissamullu ukkatarinninnerulernermik imaqartussaapput aammalu avatangiisinut pitsaassusissanik pitsaanerpaarpaanik atuinissaq pillugu piumasaqaatigut ersarissarneqassallutik.

Naalakkersuisut inatsisissatut siunnersuutit marluk taakkua suliarineqarneranni allannguutissatut kissaatigineqartut isiginiassavaat. Siunnersuuteqarnermi siunertaasooq pillugu siunnersuuteqartoq Naalakkersuisut isumaqatigaat, kisianni eqqoqqissaartumik oqaasertaliinissaq isumaliutersuutigissallugu.

”Kalaallit Nunaanni pissutsinut” pingaarnertigut ataatsimullu isigalugu innersuussinerup eqqoqqissaanngissinnaanera aarlerinaateqarpoq, tassami tamanna atugassarititaasunik sukannernerusunik qasukkaanerusunillu kinguneqarsinnaammat. Taamaattumik nunami namminermi imaluunniit nunani tamalaani pitsaassusissat atorineqarnerisut apeqqutaatinnagu, ingerlatassat avatangiisinut ajoqusiisinnaannginnissaat oqaasertassaanni inaarutaasuni qulakkeerneqassaaq.

”Nunani tamalaani suleriaatsimut pitsaanerpaamut” innersuussinermut tunngatillugu, pisuni ataasiakkaani nunani tamalaani suleriaaseq pitsaanerpaaq suunersoq ersarittannginnera anigorniagassaavoq. Taamaattumik taamatut oqaasertaliinerup paasineqarnissaa nalilersorlugu suliaqarneq Naalakkersuisut aallartereerpaat.

Oqaatigineqassaaq inatsisissatut siunnersuutissat pisussat kingunerisaannik aatsitassanut ikummatissanullu inatsit atorunnaarsinneqarluinnartussaannngimmat. Taamaalilluni ikummatissiassanik ingerlatassanut sinneruttuusinnaasunut, aatsitassanut ikummatissanullu inatsit suli atuuttussaassaaq, kisianni ikummatissiassanut ingerlataqarnissaaq siunissami unitsissallugu Naalakkersuisut aalajangeereermata, taakkununga tunngatillugu inatsisip allanngortinnissaa pisariaqanngissorineqarpoq.

Naalakkersuisut allannguutissatut siunnersuummik siunnersuuteqarput:

Inatsisartunit aalajangigassatut siunnersuut, Naalakkersuisut peqquneqassasut inatsisiliassami qulakkeerneqassasooq isumannaallisaanermi avatangiisinullu tunngasuni piumasaqaateqassasooq qaffasinnerpaanik innuttaasunillu akuutitsinerulertoqassasooq ammanerulertoqarlunilu.